



IV GOVERNO CONSTITUCIONAL
SECRETARIA DE ESTADO DO CONSELHO DE MINISTROS

KOMUNIKADU IMPRENSA

Reuniaun Konsellu Ministrus nian ba loron 11 fulan Novembru tinan 2009

Konsellu Ministrus hala'ó soru-mutu iha loron Kuarta ohin, loron 11 fulan Novembru tinan 2009, iha Sala Soru-Mutu Konsellu Ministrus nian, iha Palásiu Governu, iha Díli, no analiza:

1. Apresentasaun kona-ba “Enkuadramentu Estratéjiku ba Dezenvolvimentu Rurál iha Timor-Leste (2010-2030)”.

Objetivu dokumentu ne'e nian mak orienta Governu no doador sira ba estratéjia komún ida kona-ba Dezenvolvimentu Rurál iha tinan rua nulu oin mai, tanba haree katak ida ne'e mós sai nu'udar Prioridade Nasionál ida husi hirak seluk.

Dezenvolvimentu Rurál kobre setór oioin, tanba ne'e, Enkuadramentu Estratéjiku elabora liu husi konsulta ho ministériu hotu no ezerse iha tempu ne'ebé hanesan hó política no estratéjia husi setór hirak ne'ebé relevante. Parseiru dezenvolvimentu nian sira, representante sira sociedade sivil nian no funsióariu relevante sira Estadu nian husi distritu sanulu resin tolu iha Timor-Leste hetan mós konsulta. Ida ne'e importante tebetebes, tanba Governu iha hela prosesu desentralizasaun nian, no lori oportunidade atu halo di'ak liután prestasaun servisu públiku sira ne'ebé esensíal.

2. Apresentasaun Planu Asaun nian husi Komisariadu EXPO 2010 Xangai Xina.

Ho loron Espozisaun Muniál Xangai nian ne'ebé bsesik dadaun, Komisariadu apresenta ba Konsellu Ministrus knaar hirak ne'ebé dezenvolve ona no asaun hirak ne'ebé presiza atu garante kapasidade, organizasaun no operacionalidade ba Representasaun Timor-Leste nian. Espesífiku liu, apresenta planu asaun nian no orsamentu to'ó tinan nia rohan.

3. Apresentasaun Kódigu Traballu Foun ba Timor-Leste.

Esbosu husi Kódigu Traballu ne'ebé apresenta iha Konsellu Ministrus refleto empregador no traballador Timor-Leste nian sira nia hakarak, sira ne'e mak fó kontribuisaun ne'ebé boot tebetebes ba elaborasaun Kódigu ne'e nia elaborasaun.

Aprovasaun no adopsaun ba dokumentu ida ne'e representa hakat ba oin boot ida ba País ne'e iha atualizasaun no modernizasaun sistema jurídiku traballu nian, nune'e hodi promove defeza no garantia direitu empregador no traballador sira nian hodi kontribui ba manutensaun ba pás sosiál iha Teritóriu Nasionál tomak.